

Standregel bis zu dem grund des Thurns mit dem Buchstaben B. bezeichnet. Demnach mach du dz Instrument fest/ dz es sich nit mehr verruck/ vnd ruck die Regel so mit dem Buchstaben D. verzeichnet ist auffrecht in den senckel/ demnach mißz von dem stand zu dem Thurn/wie vil schuch es ist/so findest du 325. schuch/ die zell auff dem Instrument vom A. gegen dem B. diewyl die Regel nit mehr dann in 100. theil ist getheilt/ must du die zahl auff die Regel da 20. ist für 100. zellen/ vnd wo 40. stadt für 200. zellen/ vnd also vortan/ vnd wenn du 325. also zeltst auff die standregel/ so komst du wo 65. verzeichnet ist/ da lege die regel mit dē absähen ein/ vñ richte sy nach der höche des Thurns/ so findest du in der auffrechten regel 94. puncten/ so zell von dem Buchstaben A. gegen dem D. wie die zahl zelt hast von dem A. gegen dem C. in der stand regel/ so findest du/ daß der Thurn hoch ist 470. schuch/ vnd findest du 115. puncten auff der Regel mit dem absähen/ vnd wenn du von dem absähen/ wo das steffeli steckt/ zeltst/ wie die anderen zelt hast/ so findest du dz du von dem Thurn stahst 575 Schuch von deinem stand oug/ der grede nach zur höche des Thurns.

Das fünfft Capittel.

Wie du die Höche eines Thurns messen solt/ vnd von deinem stand bis zu der höche des Thurns.

S Ang auff ein ebene da du zwen Stend haben kanst/ vnd zu dem grund des Thurns sehen/ vnd nimm den vorgebrauchten stecken/ vnd steck ihn mit dem Steffe in die Erden/ vnd strub das Instrument nach der fläche auff den Stecken/ vnd ruck die Standregel mit dem Buchstaben B. zu deinem stand/ den du zuvor erwelt hast/ vnd funden 120. Schuch. Demnach ruck die Regel mit dem D. gegen dem grund des Thurns/ vnd sich was es für ein zahl in der halb runden Schyben abschnydt/ da mach ein pünctli